

# La Vallonia en Europa

## Tge munta il nov conflict beltg?

DA GUIU SOBIELA-CAANITZ

■ **La Vallonia blocchescha in patg commercial tranter l'Uniuon europeica (UE) ed il Canada. Quai ha segir fatg smirvegliar blera glied en noss continent. In conflict cun la Gronda Britannia, quai chapesch'ins, ma cun la Vallonia, in pajais da mo 3,5 milliuns olmas ch'ins na chatta gnanca sin ina charta geografica «normala», è quai pussaivel?** L'emprim insaquants fatgs.

La Vallonia (16 844 km<sup>2</sup>, bundant duas giadas il Grischun) è la pli vasta da las trais regiuns che furman il reginam beltg. Il flum Our la separa qua e là dal «Bundesland» tudestg da Renania-Palatinat; il flum Lys separa da la Frantscha l'exclava vallona da Comines-Varneton (passa 18 000 olmas). Ins po cumparegliar l'istorgia da la Vallonia dapi il congress da Vienna (1815) con quella dal chantun Giura. Ils diplomats rimnads a Vienna disfidavan da la Frantscha e levan rinforzar ils stadis limitrofs cun parts da l'antierur imperi da Napoleun. Il chantun Berna ha pia survegnì ina gronda part da l'antierur principadi episcopal basilais; il reginam nov dals Pajais Bass cumpigliava t. a. in territori che furma dapi 1830 la Belgia (oz 11,2 milliuns olmas). Omdus intschess han ina ferma maioritad francofona; germanofons èn mo pli en Vallonia l'intschess da la «Deutschsprachige Gemeinschaft» (76 328 olmas) ed en il chantun Giura la vischnanca d'Ederswiler. La lescha conceda dretgs linguistics a las minoritads flamas da Comines-Varneton ed a trais autras vischnancas da Vallonia. La regenza ed il parlament da la Vallonia residieschan a Namur (110 691 olmas). Primminister Paul Magnette, docent da politologia a l'Universitad libra da Bruxelles/Brussel (sic!), ha publictà 2015 in essai intitulà: «La gauche ne meurt jamais». Il parlament dumbra 75 deputadas e deputads:

30 da la Partida socialista, 25 dal Movement refurmativ, 13 dal Center democratic umanistic e 4 «écolos».

### Tgi arbitrass davart il patg commercial?

«Le Courrier» (Genevra) e «La Liberté» (Friburg) han publictà ils 25 d'october in'intervista da primminister Magnette davart il patg commercial cun il Canada: «Ils 12 d'october 2015 hai jau inoltrà a la Cumissiun europeica la resoluziun dal Parlament vallon davart nossas resalvas. Deplorablmain ha la cumissiun entschavì a discutir cun nus pir ils 4 d'october 2016 (...). Set stadis commembers da l'UE èn pli pitschens che la Vallonia\* (...). Il patg cun il Canada prevesa l'arbitradi d'in tribunal che na garantiss betg l'indipendenza dals urdens giuridics europeics e canadais. Perquai pudessan las fatschentas multinaziunalas limitar l'aziun publica dals stadis.» «Le Monde» (Paris) dals 17 d'october punctuescha: «Ils Vallons teman per il futur da lur agricultura e da lur normas socialas ed ecologicas (...). Ils purs teman che las multinaziunalas americanas (...) cun sedia en Canada profitassan da la cuvegna per penetrar en ils martgads europeics, cunzunt cun lur charn producida grazia ad ormons e lur giaglinom cun clor.» La Vallonia ha persvadi ina segunda regiun beltg, la «Région Bruxelles-Capitale/Brussels Hoofstedelijk Gewest» (passa in milliun olmas), da refusar il patg commercial cun il Canada; ses parlament regiunal cumpiglia 89 deputadas e deputads (25 da las partidas socialistas, 22 da las liberalas, 11 «écolos» euv. Ussa para che l'UE ed il primminister beltg Charles Michel, in Vallon, hajan chattà ina schli-giazion che cuntentia las duas regiuns. Co va quai vinavant?

\* [Quai constat areguard la cifra da populaziun: Cipro, Estonia, Lettonia, Lituania, Luxemburg, Malta, Slovenia.]